

四庫全書

子部

欽定四庫全書

山堂肆考卷二百五

明 彭大翼 撰

果品

李子

格物總論李實數種或朱或黃或綠或紫或斑點大者如杯小者如雞卵核小味甘脆皆果中之珍也

陳井

孟子曰陳仲子居於陵三日不食井上有李螬食實者

過半矣匍匐往將食之

杜陵

述異記杜陵有金李大者夏李小者鼠李

生奇光

漢武內傳李少君謂帝云鍾山之李大如瓶臣食之生奇光

為上藥

漢武內傳仙之上藥有員丘紅李

無實

爾雅休無實李
瘞接慮李
駸赤李

合枝

西京雜記漢武帝初修上林苑羣臣各獻名果樹有朱李黃李紫李綠李綺李青房李車下李顏回李合枝李
羌李燕李猴李又唐書貞觀中玉華宮有李連理隔澗
合枝

韓終

洞冥記琳國多生玉華李五千歲一熟仙人韓終嘗食之亦名韓終李

朱仲

潘岳閒居賦房陵朱仲之李注云房陵朱仲有李園二十六所

冬華春熟

廣志鄴園有春李冬華春熟

仙縹神紅

李果賦仙李縹而神李紅梁沈約麥李詩色潤房陵縹
味奪寒水朱

安陽殿

述異記魏文帝安陽殿前天降朱李八枚啖一可數日
不食晉宮闕名曰暉章殿前有嘉李

嘉慶坊

唐韋述兩京記東都嘉慶坊有李樹其實甘鮮為京都
之美故人稱為嘉慶子白樂天詩東都綠李萬州栽君

子封題我手開把得欲嘗先悵望與渠同別故鄉來

沈寒水

魏文帝與吳質書浮甘瓜于清泉沈朱李于寒水

薦冰盤

韓文公詩冰盤夏薦碧實脆

龍血

琴庄美事崔奉國家一種李肉厚而無核識者曰天罰
乖龍必割其耳血墜地生此李也

鼠精

好事集王侍中家堂前有鼠從地出其穴則生李樹花實俱好此鼠精李也

南居

風土記南居細李四月先熟

東苑

張華真人篇朱李生東苑甘瓜出西郊

羲之帖求

王右軍帖青李來禽櫻桃日給藤子皆囊盛為佳函封多不生足下所疏云此果佳可以致子當種之吾篤喜果今在田里速為致此子則大惠也按洪玉父云來禽以味甘來衆禽也又日給亦果名其花似柰子

直方品第

國史補李直方嘗第果品以綠李為首櫻梨荔枝櫻桃為三柑子為四蒲桃為五或薦荔枝曰當舉之首

過則避嫌

古樂府歌君子防未然不虞嫌疑間瓜田不納履李下不整冠宋陶弼詩主人肝膽無猜忌果下遊人但整冠
見則思戒

五代唐莊宗年邁多疾馮道入朝奏曰臣願陛下寢膳之間尤宜調衛因指御前果實曰如食不康他日見李而思戒可也

柰子

格物總論柰子或白或丹或紫或以為大如升或以

為大如兔頭熟于夏固其時也而或冬熟者亦有之

三玄

南岳夫人還王屋山王子喬等並降時夫人與四真人
為賓主設三玄紫柰

七實

晉起居注嘉柰一帶或十五實或七實生于酒泉又廣
志酒泉有赤柰張掖有白柰

紫綠

西京雜記上林苑有紫柰花紫綠柰花綠

春秋

虎丘山疏山下三面有春秋柰

摘玄丘

漢武故事摘玄丘之紫柰

投清渠

潘尼東武館賦飛甘瓜于浚水投素柰于清渠

獨坐不顧

三國典略楊愔四世同居庭有柰實落于地羣兒咸爭
愔獨坐不顧季父見之曰此兒恬裕有我風

先與不嘗

王僧孺五歲父友有餽其父延年柰者先與僧孺僧孺
曰大人未見不敢先嘗不受

夏成

文選素柰夏成

寒熟

劉孝儀曰太沖噓其夏成子建愷其寒熟

浮朱

孫楚井賦沈黃李浮朱柰

耀白

潘岳閒居賦三桃表櫻胡之別二柰耀丹白之色

野猪澤

孔氏帖白柰出涼州野猪澤大如兔頭

白馬寺

伽藍記白馬寺柰實重七斤至熟時常取之或以賜宮人宮人轉遺親戚以為奇異

王祥守視

見繼母

聖俞縱窺

宋梅聖俞詩纍纍後堂柰落盡風雨枝行樂偶散步倚杖聊縱窺林葉隱孤實山鳥曾未知物亦以晦存悟茲身世為

梨子

格物總論梨有青黃紫三色肉白子少食之甘脆無渣滓者為佳品本草以梨為快果清異錄建業野人種梨者詫其味曰蜜父

玄光

漢武內傳太上之藥有玄光梨

青玉

西京雜記上林有青玉梨金柯梨縹帶梨紫條梨

上二箱

魏武帝為兗州牧上書曰山陽郡有美梨謹上二箱

賜一奩

見仙

解煩消愆

魏文帝詔真定御梨大若拳甘若蜜脆若菱可以解煩

消愆

敲齒沃心

辛寅遜詩嚼處春冰敲齒冷嚙時雪液沃心寒

御宿

三輔黃圖漢武帝樊川園一名御宿有大梨如五升落地則碎取者以布囊盛之名含消

靈關

齊謝朓謝賜梨啟味出靈關之陰

明光一株

晉宮闕名明光殿前梨一株

滎陽千樹

食貨志淮北滎陽河濟之間千樹梨其人與千戶侯等

瀚海耐寒

西京雜記上林苑有瀚海梨出自瀚海耐寒不枯

青城消熱

青城山紫花梨能消心熱唐武后患此疾山中邢道人
進此梨即愈

張谷

潘岳閒居賦張公大谷之梨梁侯烏枿之柿按洛陽北郊張公夏梨海內惟一樹

哀家

世說桓南郡每見人不快輒嗔曰君得哀家梨當復不蒸食否舊說秣陵有哀仲家梨甚美大如升入口即消釋言愚人別味得好梨蒸食之也

玄圃園

晉太康中有梨樹四株其條與中枝合生于玄圃園皇

太子令侍臣作頌

青田村

永嘉記青田村人家多種梨樹大一圍五寸恒為供獻
名曰御梨

座中剖分

世說道安公嘗集講僧數百人習鑿齒餉十梨值講安
公便于座中手自剖分梨盡人徧都無偏頗

爐中燒賜

鄴侯傳唐肅宗嘗夜坐召顏王等三弟同坐地爐時李
泌方絕粒上自燒二梨以賜之顏王等曰臣等請聯句
以為他年故事顏王曰先生年幾許顏色如童兒信王
曰夜抱九仙骨朝披一品衣一王曰不食千鍾粟惟餐
兩顆梨上曰天生此間氣助我化無為

賞以轉枝

童子通神集房次律弟子金圖十二歲時次律問葛洪
仙錄中事以水玉數珠手節之凡兩編三百事次律賞

以轉枝梨

目為釘坐

唐書崔遠文才清麗風神峻整當時目為釘坐梨言席上之珍也

孔融取小

見神童

玄謨責多

宋吳淑梨賦責多而貪者玄謨按宋書王玄謨征滑台

一疋布責民八百梨

河中上貢

地理志河中府上貢鳳棲梨

江南盛傳

廣五行志宋廢帝太始年江南盛傳消梨先無此樹自此百姓爭植之既而後齊蕭氏受禪識應于此

枝垂六斤

庾肩吾謝賜梨啟昨陽東苑子圍三尺新豐箭谷枝垂

六斤又洛陽伽藍記報德寺有含消梨重六斤從樹投地盡化為水

實徑三尺

神異經東方有梨實徑三尺剖之白如素食之為地仙玉有漿

宋丁晉公詩玄圃雲腴滋絳質上林風御獵清香尋芳尚意瓊為樹蠲渴應知玉有漿

瓊為汗

楊誠齋詩掛冠大谷肯干時
釘坐風流特地竒
骨裏馨香衣不隔
曲中冰雪齒先知
賣漿碎搗瓊為汁
解甲方憐玉作肌
老子醉來渾謝客
見渠倒屣只嫌遲

塗山如斗

洞冥記塗山之北有梨大如斗
紫色千年一花
冬月乃實
煎之有膏
食者身輕

安吉如升

吳越備史李昇本姓徐
湖州安吉人為安吉
令先是其

家有梨結一實大如升其父異之將獻郡守有謂其父曰此果非常有如來年見索將如之何不如勿獻其父然之因會鄰里共食即席剖之有赤虵在實中剖者大驚投刀于地俄而赤虵走于母榻之下尋之無見未幾其母遂孕知誥

栗子

格物總論栗子苞生刺多如蝟毛其中著實或單或雙或三四數之少者其實大多者其實少實有殼殼紫黑

色殼內膜內肉皆黃白色八九月方熟熟時苞自
發罅而實隨隕焉本草人有脚弱者啖栗數升遂能
行

產五方

詩䟽義栗五方皆有周秦吳揚特饒唯范陽漁陽栗甜
美味長

出三輔

范子計然曰栗出三輔魏志三韓之地大栗如梨

集鵲

莊子曰周遊乎雕陵之樊觀一異鵲感周之穎而集于栗林注云感觸也

養狙

列子曰宋有狙公者養狙成羣恐衆狙之不馴于己也先誑之曰與若芋朝三而暮四足乎衆狙皆起而怒俄而曰與若芋朝四暮三足乎衆狙皆伏而喜聖人以智籠羣愚亦猶狙公之以智籠衆狙也按芋小栗也

秦苑

韓子曰秦饑應侯言于王曰五苑之果蔬橡棗栗可以活人請發與之

漢園

漢武帝果園中有大栗十五枚可為一斗

箕山

呂氏春秋伊尹曰果之美者江浦之橘箕山之栗

汝水

汝水灣中有栗

田饒待士

說苑田饒曰果園梨栗後宮婦人撫以相摘而士曾不得一嘗故宋吳淑賦田饒勸之以待士

宗度禮賢

謝承後漢書豫章宗度拜定陵令縣人杜伯夷清高不仕度與談論設棗栗而已故宋吳淑賦宗度置之而禮賢

為女贄

左莊二十四年御孫曰女贄不過榛栗棗脩以告虔也

比侯封

漢書燕秦千樹栗其人與千戶侯等

擲君

梁書蕭琛嘗預御筵醉伏武帝以棗投琛琛乃取栗擲
上中面御史中丞在席帝動色曰此中有人不得如此
豈有說耶琛答曰陛下投臣以赤心臣敢報之以戰栗

上笑悅

散妓

小說殷七七名文祥能造須臾酒開頃刻花嘗于一官
僚處飲酒取粟散于官妓皆聞異香惟笑七七者粟綴
于鼻不可脫但聞臭氣須臾狂舞粉黛狼籍人為陳過
粟方墮

中山地產

盧毓冀州論中山好粟地產不為無珍

錦里先生

杜詩錦里先生烏角巾園收芋栗未全貧

各取所及

會稽先賢傳光武詔嚴遵詣行在遇蜀郡獻栗橘上賜
公卿以下使各以手所及取之遵獨不取上問其故遵
曰君賜臣以禮臣奉君以恭今賜無主臣是以不敢取
各疏所知

梁書沈約嘗侍宴會豫州獻栗大徑寸帝竒之問衆栗

事多少與約各疏所知約少帝三事約出謂人曰此公
護前不讓即羞死帝聞其言不遜欲抵其罪徐勉固諫
而止

擲柱

宋書初劉秀之從叔穆之為丹陽尹與子弟宴集廳事
柱有一穿者穆之謂子弟曰汝等各以粟遙擲入穿處
必得此郡唯秀之粟獨入焉後果為丹陽尹

散牀

見神童

白鴉谷

杜詩盤剝白鴉谷口栗

玄猿窟

韋應物詩採栗玄猿窟

蔡祠

人有折蔡氏祠前栗者故蔡邕作栗賦何根莖之豐且美
嗟天折以摧傷

楊墓

宋楊延慶太宗時人奉親至孝母死葬畢廬于墓前母存日喜食粟乃種二粟樹于墓前經年其樹連理三年合抱生粟盈枝人謂孝感所致也

欽定四庫全書

山堂肆考卷二百六

明 彭大翼 撰

果品

棗子

格物總論棗實大者如雞卵小者如雞心核小者為佳爾雅注今江東棗大而銳上者呼為壺棗言棗猶瓠也細腰者今謂鹿盧棗清異錄百益一損者棗一益百損者梨醫氏曰棗為百益紅梨為百損果

曾子不食

孟子曰曾皙嗜羊棗曾子不忍食羊棗爾雅注實小而圓紫黑色俗呼為羊矢棗

鮑焦強吐

風俗通鮑焦耕田而食鑿井而飲在山中唯食棗或曰子所植耶遂強吐之立枯而死

實如瓶

尹喜與老子西遊省太真王母共食玉文之棗其實如

瓶

核如針

洛陽伽藍記景陽山有百果園果有仙人棗長五寸核
細如針霜降乃熟

赤心

西京雜記帝修上林苑羣臣各獻名果有青華棗赤心
棗

朱實

潘岳笙賦棗下纂纂朱實離離

萬年一實

洞冥記房塘細棗出房塘山山臨碧海此棗萬年一實
笮之有膏可用燃燈漢武帝元鼎元年起招仙閣進房
塘棗

百歲一實

拾遺記北極有岐峯之陰多棗樹百尋其枝莖皆空實
長一尺核細而柔百歲一實

上林獻

漢武帝時上林獻棗上以所持杖擊未央殿前檻呼東
方朔曰叱叱先生東東先生知此筐中何物朔曰上林
苑獻棗四十九枚上曰何以知之朔曰以呼朔者上也
以杖擊檻者兩木也兩木林也東東者棗也叱叱者四
十九也上大笑賜帛十疋

安平產

盧毓冀州論安平好棗地產不為無珍

安邑千樹

漢書安邑有千樹棗其人與千戶侯等

官園三星

廣志官園有三星棗駢白棗蹙咨棗

含核不食

後漢書孟節能含棗核不食可至十年

含棗不饑

東陽記信安縣有懸室坂晉時有民王質伐木至石室

中見童子四人彈瑟而歌質因倚柯聽之童子以一物如棗與質含之便不復饑

請活饑民

見粟

請賦戰士

英雄記孔文舉為東萊賊所攻城欲破治中左承祖請以官棗賦與戰士

啖吉

見夫

擲琛

見粟

用哺程莫

蔡邕奏事程莫年十四時叔父病故莫抱叔尸號泣悲
哀舅哀其羸劣嚼棗肉以哺之莫見食歔歔不能吞咽
不媚劉勲

杜氏新書杜畿為河東太守平虎將軍劉勲為太祖所

親貴震朝廷常從畿求大棗畿拒以他故後勲伏法太祖得其書嘆曰杜畿可謂不媚竈也

石園葱茂

鄴中記石虎園有西王母棗味絕美枝葉葱茂四時不凋九月生花十二月熟

趙庭婆婆

北夢瑣言石晉朝趙令公瑩庭有孺棗婆婆娑異常四遠俱見望氣者曰此家有登宰輔者不在其身在其子

孫後令公由太原遂大拜

大如爪

史記李少君以卻老方見上曰臣曾遊海上見安期生食巨棗棗大如爪

大如卵

河東猗氏縣出大棗子如雞卵

弱枝

潘岳閒居賦同文弱枝之棗

無核

神仙傳永樂縣有無核棗人不可得永樂道士侯道華竊食之

棗長二寸

廣志穀城紫棗長二寸

棗長四寸

大業拾遺錄信都獻仲思棗長四寸紫色而細文

狗牙

廣雅棗有狗牙雞心牛尾羊角獼猴細腰之名

羊角

鄴中記石虎園中有羊角棗清異錄睢陽有雞冠棗宜作脯醎醐棗宜生啖或謂棗是聖花兒

仙人棗

雜俎晉時太倉南華林園有棗長五寸其核如針名仙人棗

夫人棗

廣志梁國園出大白棗又有夫人棗

橘子 附金橘

格物論橘有數種枝多生刺葉兩頭尖三月著花結實至冬黃熟一名木奴春秋運斗樞曰璇星散為橘金橘為小木奴元稹詩金丸小木奴又廣州記盧橘皮厚大如柑酢多至夏熟土人呼為壺酒

揚州錫貢

夏書淮海惟揚州厥包橘柚錫貢

南越出稅

任昉述異記越多橘柚園越人歲出橘稅

可口

莊子曰三王五帝之禮義法度譬諸櫛梨橘柚其味相反而皆可于口

裂牙

吳志吳王餽魏文帝大橘帝詔羣臣曰南方有橘酢正裂人牙時有甜耳

晏子不剖

晏子春秋晏子使楚楚王進橘置削晏子併食不剖王曰橘當剖對曰臣聞賜人主前者瓜桃不削橘柚不剖今者萬乘無教故不敢剖臣非不知也

虞愿不取

南史虞愿始數歲家中橘樹冬熟諸兒競取之愿獨不取家人皆異之

比封君

漢食貨志江陵千樹橘其人與千戶侯等

號木奴

白六帖李衡種甘橘千樹號千頭木奴言利博也

踰淮為枳

見淮列子曰橘柚有鄉又曰橘柚凋于北徙若榴鬱于東移

渡江化橙

淮南子曰夫橘樹至江北化為橙

贈漢女

張衡南都賦遊女弄珠于漢臯之曲注云遊女漢女也
鄭大夫交甫於漢臯見之而贈以橘柚

擲蔣侯

會稽東野有女子姓吳字望子路中忽見一貴人儼然
端坐即蔣侯像也因擲兩橘與之遂數數形見即與情
好

交趾置官

異物志漢武帝時交趾有橘宮置長一人秩三百石主
歲貢御橘

蜀土給客

魏王花木志蜀土有給客橙似橘而非若柚而香冬夏
華實相繼通歲食之亦名盧橘

洞庭山

山海經洞庭之山其木多橘又廣州記羅浮山橘夏熟
實大如梨又東方裔外有建春山上多橘柚

德陽殿

李尤德陽殿賦橘柚含桃百果成叢

請除橘籍

吳闕澤表請除臣橘籍故宋吳淑賦闕澤抗表以除籍
請弛橘禁

孔六帖薛戎遷浙東觀察使舊例所部州橘未貢先鬻
者死戎請弛其禁

遺母

吳志陸績字公紀年六歲于九江見袁術術出橘績懷數枚去拜而墮地術謂曰陸郎作賓客而懷橘乎跪答曰欲歸遺母術大奇之

賜臣

唐太宗蓬萊殿九日宴羣臣賜湖南新橘

屈庭

謝承後漢書沛國桓儼字文林罷縣居揚州從事屈豫室中庭有橘樹一株遇其實熟乃以竹藩樹四面風吹

兩實墮地即以繩縛繫于樹

蘇井

見醫士

五官獻

益部耆舊傳楊由為成都文學少治易曉占候忽有風起太守廉范問之由曰南方有薦木實者色黃赤頃之五官掾獻橘數包

二叟戲

見仙

羲之帖送

王羲之帖奉橘三百顆霜未降未可多得

應物詩贈

唐韋應物故人九日求橘戲贈憐君病後思新橘始摘
猶酸亦未黃書後欲題三百顆洞庭須待滿林霜

一蒂十二實

續世說晉咸和六年平西將軍庾亮貢橘十二實共一

蒞以為瑞羣臣畢賀

一囊數百枚

江淮異錄陳允升好道撫州危全諷迎置郡中嘗夜坐危謂之曰豐城橘美頗思之允升曰方有一船泊豐城港今為取之港去城十五里少選即還攜一布囊有橘數百枚

厚貨以致

廣記唐劉晏字士安凡江淮茗橘珍甘常與本道分貢

競欲先至雖封山斷道以禁前發每厚貲以致之為諸
府冠

計直以償

見節度

屈原橘贊

后皇嘉樹橘徠服兮受命不遷生南國兮深固難徙更
壹志兮綠葉素榮紛其可喜兮曾枝剌棘圓果搏兮青
黃雜糅文章爛兮精色內白類可任兮紛緼宜修姱而

不醜兮又傳玄菊賦詩人覩王睢而詠后妃之德屈平
見宋橘而申貞臣之志

德裕橘賦

李德裕橘賦序清霜始降聖人命中使賜宰臣等朱橘
各三枚蓋靈囿所植也臣敢稽首而獻賦美南州之嘉
樹受烈氣于炎德固一志于殊方遂不遷于上國貞枝
凝碧蔚湘岸之夕陰華實變黃動江潭之秋色

珠顆瓊漿

白樂天詩珠顆形容隨日長瓊漿氣味得霜成

白花朱實

周李元操詩白花如霰雪朱實似懸金布影臨丹地飛
香度玉岑

光如金彈 已下金橘

歸田錄金橘產于江西香清味美置之樽俎光彩的皪
如金彈珍果也都人初不甚貴後溫成皇后尤好食之
由是價重京師余家世江西吉州人甚惜此果若欲久

留著于菜豆中藏之可經時不變蓋橘性熱而豆性涼
故能久也

圓並明珠

王岐公詩黃欺晚菊垂金砌圓並明珠落翠盤

清臣和賜

李清臣和賜後苑金橘詩苑臣初摘置瑠盤口勅宣恩
賜近官氣味豈同淮枳變皮膚不作楚梅酸參差翠葉
歲珠玕錯落黃金鑄彈丸安得一株擎雨露畫圖傳與

世人看

魯直督寄

黃魯直因歐陽從道許寄金橘詩以督之詩云禪客入
秋無氣息想依紅袖醉培塿霜枝搖落黃金彈許送筠
籠殊未來

柑子

附橙柚香櫞

格物叢話柑者橘之屬有黃者有頰者頰者形如石
榴謂之壺柑亦曰乳柑惟温州泥山為最皮厚味珍

食不留滓一顆中核纔一二間有全無者晉時閩中
縣置守黃甘吏一人橙亦橘屬枝葉不類于橘苞黃
皮厚感衄如沸香氣馥郁可以熏衣可以芼鮮可以
漬蜜呂氏春秋果之美者有雲夢之柚柚大橘也與
橘同時而熟香櫟亦似柚而長倍之味香美故謂之
香櫟亦曰枸櫟今南劔州產此取以供歲貢也

致于榻前

異聞錄漢武帝時董元素自江南來上召見留宿翰林

夜召與語曰聞公有神術今江南柑橘正熟卿能致之
否對曰請安一合于御榻前數刻忽有微風入簾元素
乃啓合柑子滿其中奏曰此江陵支縣柑也遠處恐來
遲上嘗之驚嘆

種子宮內

太真外傳開元末江陵進乳柑橘上以十枚種子蓬萊
宮至天寶十載九月結實宣示宰臣曰朕于宮內種柑
子數株今秋已結實一百五十顆乃與江南及蜀道所

進不異宰臣賀曰雨露所均混天區而齊被草木有性
憑地氣以潛通

張磐鞭卒

謝承後漢書張磐字子石為廬江太守潯陽令嘗餉一
奩甘其子年七歲就取一枚磐奪付外卒因私以兩枚
與兒磐鞭卒曰何故行賂于吾子

李衡勅兒

襄陽記李衡字叔平為丹陽太守每言治家妻輒不聽

後密遣人于龍陽洲上作宅種橘千株臨終勅兒曰汝
毋惡吾治家故窮如是吾洲上有千頭木奴不責汝衣
食歲得一尺絹亦足用矣及柑成歲得輸絹數千尺

生枝

温州福州江陵天台等處有生枝土人以其耐久留之
枝上俟其味變甘乃帶葉而取故名焉

平蒂

廣志成都有平蒂柑大如升

賈誼種柑

湘州記州故大城內有陶侃廟其地漢賈誼嘗種柑猶有存者

公遠嗅柑

唐明皇食柑千餘枚皆缺一瓣問進柑使者云中途有道士嗅之蓋羅公遠也

王導帳下

見慳吝

義康府中

宋書時四方獻饋皆以上品獻彭城王義康而以次者供御上嘗啖柑嘆其味劣義康在坐曰今年柑殊有佳者遣人還東府取柑至大三寸

戴顓攜雙

見春

僧珍食一

梁書呂僧珍既有大勲任總心膂性甚恭慎當禁中盛

暑不敢解衣每侍御坐屏氣鞠躬果食未嘗舉筋嘗醉
後取一柑食武帝笑謂曰卿今日大有所進于是俸祿
外令月給錢十萬文

南樓寺

唐史開元中有神仙持羅浮柑子種于南樓寺其後常
資進獻至幸蜀幸奉天之歲皆不結實

東望山

述異記南陽郡東望山有柑正熟嘗有三人造之共食

致飽訖懷二枚去欲以示外人迴旋半日迷不得歸聞
空中語云放雙柑乃放汝去懷柑者恐怖放柑于地轉
盼即見歸徑

蠟封

隋文帝好食柑蜀中摘黃柑即以蠟封其蒂獻之

布裹

唐新語益州進柑皆以紙裹之他時長吏嫌紙不敬代
以細布既而恐柑為布所損每懷憂懼俄有御史甘子

布至長吏以為推布裹柑子事懼曰果為所推及子
布到驛長吏叙以布裹為敬子布初不之知久而方悟
聞者莫不笑

黃羅包

見元宵

紫帕包

唐史荊州進黃柑帝以紫帕包賜蕭嵩

歸遺細君

見元宵

堪養老夫

柳子厚柳州城北種柑詩手植黃柑三百株春來新葉
徧城隅方同楚客憐皇樹不學荊州利木奴幾歲開花
聞噴雪何人摘實見垂珠若教坐待成林後滋味還堪
養老夫

子瞻黃甘傳

蘇子瞻黃甘陸吉傳曰黃甘陸吉楚之二高士也吉與

甘齋名一旦吉位居上甘心銜之吉哂然謂曰請與子
論事吉論二事甘皆曰不如也吉曰二者皆出吾下而
位吾上何也甘徐應之曰每歲太守勸駕乘傳入金門
上玉堂與虞荔申振梅福棗嵩之徒列侍上前使數子
者口吐舌縮不復上齒牙間當此之時屬之于子予屬
之于我乎吉默然良久曰屬之于子矣甘曰此吾所以
居子之上也于是羣臣皆伏

彥直真柑錄

韓彥直真甘錄曰柑別種有八橘別種為十四橙屬別種為五凡其類合二十有七而乳柑推第一故溫人謂乳柑為真柑謂他種皆若假設者而獨真柑為柑爾且溫數邑俱種柑而出泥山者又傑然推第一予北人安得所謂泥山者啣之又故事太守不得出城從遠遊無因領客入泥山香林中泛酒其下而客乃遺予泥山柑者予因為之譜

借色 已下橙子

黃山谷詠橙麪詩天將金闕真黃色借與洞庭霜後橙
松滋解作逡巡麪壓倒江南好事僧

助香

梅聖俞食橙寄謝舍人詩洞庭朱橘未弄色襄水錦橙
多已黃玉臼搗齏憐繪美金盤按酒助杯香雖生南土
名猶重未信中州客厭嘗欲寄百苞憑驛去只因佳味
怯風霜

實繫繫

張右史詩清霜夜漠漠佳實曉累累鵲殼攢蜂幹金花
耀暖曦

樹團團

歐陽永叔詩嘉樹團團俯可攀壓枝秋實漸爛斑朱欄
碧瓦清霜曉粲粲繁星綠葉間

抱遺才嘆

劉屏山彥沖橙詩橙橘甘酸各效能南苞錫貢不同升
果中亦抱遺才嘆有客攀條氣拂膺

有貴人色

屏山詩常懷細雨初移日著子已見清霜潛絕憐面有
貴人色偶致吾儕樽俎間

當家僮 已下 袖子

柳子厚詩橘柚當家僮

贈遊女

見橘

耀密林

柳詩橘柚懷貞質受命此炎方密林耀朱綠晚歲有餘芳

依茅屋

杜詩茅屋依橘柚又云荒庭垂橘柚


如柚 已下香櫞

廣州記枸櫞似橘如柚大而倍長味奇酢

似橙

嶺表錄枸櫞形如瓜皮似橙而金色故人重之且愛其

香氣南土女人競取其肉雕鏤花鳥浸之蜂蜜點以臘
脂亦不讓于鏤木瓜冬瓜也



山堂肆考卷二百六

欽定四庫全書

子部

山堂肆考卷二百七
九至

詳校官中書臣閔思毅

主事臣祁韻士覆勘

總校官降調編修臣倉聖脈

校對官中書臣葉蘭

謄錄監生臣任銜萱

欽定四庫全書

山堂肆考卷二百七

明 彭大翼 撰

果品

柿子

格物總論柿以核少者為佳皆八九月後方熟南劍
尤溪柿處州松陽柿最為奇品餘皆不及也

牛心

柿有數種有如牛心者有如雞鴨卵者又有名鹿心者

虬卵

韓退之詩友生招我佛寺行正值萬株紅葉滿光華閃
壁見神鬼赫赫炎官張火傘燃雲燒樹火實駢金鳥下
啄頰虬卵覓翻眼倒忘處所赤氣沖融無間斷有如流
傳上古時九龍照耀乾坤早二三道士席其間靈液屢
進玻璃盃

七絕

酉陽雜俎俗謂柿有七絕一壽二多陰三無鳥巢四無

蟲五霜葉可玩六嘉實七落葉肥大

八稜

地理志梁園有烏桺柿八稜

熟蒂甘香

劉屏山詩秋林黃葉晚霜嚴熟蒂甘香味得兼火傘虬
珠浪襖拂風標卻似色中黔

金衣玉液

古詩色勝金衣美甘逾玉液清

仲山洗分

瀉山禪師與仲山遊行烏銜一紅柿墜前仲山以水洗
淨與瀉山分半

鄭虔書徧

小說鄭虔好書苦無紙慈恩寺貯柿葉數屋虔日取隸
書歲久殆徧

凍蜜

楊誠齋詩紅葉曾題字烏桺昔擅場凍乾千顆蜜尚帶

一林霜核有都無底吾哀喜細嘗慙無瓊玖句報惠不相當

裹酥

張仲殊詞味過華林芳蒂色兼陽井沈朱輕勻絳蠟裹團酥不比人間甘露神鼎十分火棗龍盤二寸紅珠清含冰蜜洗雲腴只恐身輕飛去

石榴

格物論石榴中如蜂窠子如人齒帶淡紅色光皎若

琥珀又有潔白如雪者漢張騫使西域得塗林安石
榴種中國有石榴始此安石國名

獻君

晉安帝時武陵臨沅獻安石榴一帶六實

薦帝

北齊安德王延宗納趙郡李祖女為妃母宗氏薦二石
榴于帝前莫知其意帝問魏收答曰石榴房多子王新
婚妃母欲王子孫衆多也帝大喜

盛送碼碯

李漢碎胡碼碯盛送王莒曰安石榴奉送莒見之不疑
食之乃覺

嚼破水晶

皮日休石榴歌蟬噪秋枝槐葉黃石榴香老愁寒霜流
霞包染紫鶯粟黃蠟紙裹紅瓠房玉刻冰壺含露濕爛
斑似帶湘娥泣蕭娘初嫁嗜甘酸嚼破水晶千萬粒

丹砂粒

梅聖俞詩安榴若拳石中蘊丹砂粒剖之珠滿盤不待
鮫人泣

錦香囊

莊布石榴歌霜風擊破錦香囊鸚鵡啄殘紅豆顆

王母庭

王禹偁詩王母庭前親見栽張騫偷得下天來

石氏園

石崇金谷園有石榴名石崇榴

丹暉細韻

潘岳河陽庭前安石榴賦丹暉綴于朱房細韻點乎紅
鬚若琉璃之棲鄧林若珊瑚之映淥水

珠骨玉漿

楊廷秀石榴詩霧縠作房珠作骨水晶為醴玉為漿又
張載賦剖之則珠散含之則冰釋

櫻桃

櫻桃一名含桃以為鶯鳥所含也一名朱櫻一名牛

桃一名麥英一名荆桃李直方第果品以櫻桃為第

三

夏羞

禮月令仲夏之月天子羞以含桃先薦寢廟又漢書惠
帝出離宮叔孫通曰古者春嘗果方今櫻桃可獻願陛
下出取以獻宗廟上許之

春就

左思蜀都賦朱櫻春就素柰夏成

賜羣臣

東漢明帝于月夜宴羣臣于園太官進櫻桃以赤瑛盤
盛賜羣臣月下視之盤與櫻桃一色羣臣皆笑云是
空盤也

奉太后

唐文宗即位內園進櫻桃以奉三宮太后

宰相廚

唐朝三月宰相有櫻筍廚時最為盛又秦中謂三月為

櫻笋時

進士宴

撫言唐新進士尤重櫻桃宴

和杏酪

唐景龍文館記帝命侍臣升殿食櫻桃並盛以琉璃和
以杏酪飲醑醪酒又上與侍臣于樹下摘櫻桃恣其食
末後大陳宴席奏宮樂至暝人賜朱櫻兩籠

雜蠟丸

唐李希烈始入汴聞戶曹參軍竇良女美強娶之又嘗
稱陳仙竒忠勇可用其妻亦竇姓願為娣姒以固其夫
希烈許諾及希烈死其子不發喪謀悉誅諸將自立未
決時有獻櫻桃者希烈妻竇氏請分遺仙竒因以蠟丸
雜果中出所謀仙竒大驚率兵入斬之

鶯含

李商隱詩惜堪充鳳食痛已被鶯含王維詩纔是寢園
春薦後非闕御苑鳥銜殘白居易詩烏偷飛處銜將火

人摘竒時踏破珠

鳳食

韓偓詩合充鳳食留三島誰許鶯偷過五湖

詩和裴傑

侯鯖錄杜牧之和裴傑新櫻桃詩忍用烹酥酪從將洗
玉盤流年如可驗何必九華丹

賦刺林甫

唐李林甫採蕭穎士名欲用之時穎士居母喪即練麻

詣京師徑謁林甫于政事省林甫初不識穎士遽見縑
麻大惡之即令斥去穎士大忿乃為伐櫻桃賦以刺林
甫

野人相贈

杜甫詩西蜀櫻桃也自紅野人相贈滿筠籠數回細寫
愁仍破萬顆勻圓訝許同憶昨賜露門下省退朝擎出
大明宮金盤玉筋無消息此日嘗新任轉蓬

舍人同食

白樂天與沈楊二舍人閣老同食勅賜櫻桃翫物感恩
成十四韻清曉趨丹禁紅櫻降紫宸驅禽養得熟和葉
摘來新圓轉盤傾玉鮮明籠透銀內園題兩字西掖賜
三臣熒惑晶華赤醞醐氣味真如珠未穿孔似火不燒
入瓊液酸甜足金丸大小勻偷須防曼倩惜莫擲安仁
已懼長尸祿仍驚數食珍最慙恩未報飽餵不才身

火齊珠

劉原父詩磊落火齊珠參差珊瑚叢

火色貝

楊文公詩團于火色貝燦極日光珠西海瑤池苑曾城
寶樹區

葡萄

按本草苗作藤蔓而極長開花極細葉密多陰其實
有紫青黑三色而形之圓銳亦有二種其汁可以釀
酒一名馬乳一名黑水精李直方第果品以葡萄為第

五

出大宛

酉陽雜俎葡萄出大宛張騫使西域得種以歸又六帖
李廣利為貳師將軍破大宛得種歸漢

得高昌

南部新書唐太宗破高昌收馬乳葡萄種于苑中併得
酒法仍自損益造酒成綠色芳香酷烈味兼醍醐韓愈
詩若欲滿盤堆馬乳莫辭挿竹引龍鬚

種離宮

異國志龜茲國人奢侈家有千斛葡萄漢使取實歸種
于離宮別館之傍

植本寺

雜俎貝丘之南有葡萄谷天寶中沙門曇霄因遊諸嶽
至此谷見枯蔓堪為杖持還本寺植之遂活長高數仞
蔭地幅員十丈仰觀若帷蓋其房實磊落紫瑩如墜時
人號為草龍珠帳

示臣

魏文帝示羣臣詔葡萄酒解酒宿醒掩露而食甘而不銷
脆而不酸冷而不寒味長汁多除煩解恚又釀以為酒
甘于麴蘖善醉而易醒道逢固已流涎咽唾况親食之
耶

奉母

唐高祖賜羣臣會食于御前有葡萄侍中陳叔達得而
不食上問其故對曰臣母病渴求不能致願歸奉之

國多葡萄

孔六帖西域有筭赤建國多葡萄

土宜葡萄

西域焉耆國土宜葡萄

太沖賦

左太沖賦葡萄結蔭注云蔓延而葉密故多蔭

禹錫歌

劉禹錫葡萄歌分岐浩繁縟修蔓盤結曲揚翹向庭柯
意思如有屬為之立長架布護當軒綠米液溉其根理

疎看滲漉馬乳帶輕霜龍鱗耀初旭有客汾陰子臨堂
瞪雙目自言我晉人種此如種玉釀之成美酒令人飲
不足為君持一斗往取涼州牧

味敵雲漿

劉禹錫詩魚鱗含宿潤馬乳帶殘霜染指鉛華膩滿喉
甘露香醞成千日酒味敵五雲漿

名壓酪奴

黃山谷詩欲收百斛供春釀放出聲名壓酪奴

不說荔枝

古詩萬里西風過鴈時
綠雲玄玉影參差
酒酣試取冰丸嚼
不說天南有荔枝

何如橘柚

梁使徐君房魏使陳昭各言方物
昭問君房葡萄何如
橘柚答曰津液奇勝芬芳減之

楊梅

格物論楊梅有紅白紫三種
紅者味勝于白紫者又

勝于紅

感于孝子

齊孝子王虛之庭中楊梅樹隆冬三實人謂孝感所致
呼為聖僧

東坡詩注揚州人呼白楊梅為聖僧

君平示兒

見神童

廷秀謝師

楊廷秀謝紹興帥丘宗卿惠楊梅詩二首梅出稽山世
少雙情知風味勝他楊玉肌半醉生紅粟墨暈微深染
紫囊火齊堆盤朱徑寸醴泉繞齒柘為漿故人解寄吾
家果未變蓬萊閣下香越絕諸楊盛一時與儂瓜葛不
曾知一夫自嘆吾衰矣此客何從夢見之也解過江尋
德祖正緣作尹是丘遲渠伊不是南村派未免先驅事
荔枝

枇杷

樹高大餘枝肥葉大而有毛冬華夏實一名盧橘然
觀司馬相如游獵賦盧橘與枇杷並列則盧橘似非
枇杷未知孰是清異錄建業野人種枇杷誇其色曰
蝟兄

供廟

唐建中元年詔山南歲貢枇杷取一次以供廟享

植庭

周祗枇杷賦序枇杷寒暑無變負雪揚花余植之庭圃

遂賦之云名同音器質異貞松四序一采素花冬馥

果產西蜀

宋景文詩有果產西蜀作花凌早寒樹繁碧玉葉柯疊
黃金丸

名著上林

梅聖俞詩五月枇杷黃似橘誰思荔枝同此時嘉名已
著上林賦卻恨紅梅未有詩

一梢滿盤

楊廷秀詩大葉聳長耳一梢堪滿盤荔枝多與核金橘
卻無酸

萬顆綴樹

劉屏山詩萬顆金丸綴樹稠遺根漢苑識風流也知不
作清朝瑞朽腐聊關聖主憂

銀杏

格物總論銀杏樹高大葉薄有刻缺一枝動百十顆
八九月熟去其皮與肉取核為果一名鴨脚因葉相

似也

南方移植

歐公詩注京師無鴨脚樹駙馬王和父自南方移于其
第

宣城充貢

晁無咎云宣城此物常充貢

類綠李

梅聖俞贈永叔內翰遺李大博家新生鴨脚詩鴨脚類

綠李其名因葉高吾鄉宣城郡多以此為豪

伴金桃

楊廷秀詩深灰殘火略相遭小苦微甘韻最高未必雞
頭如鴨脚不妨銀杏伴金桃

胡桃

胡桃生北土今陝洛間多有之大株厚葉多陰實青
瓤白味甘殼薄者為佳食之令人肥健本草此果本
出羌胡漢張騫自西域還始得其種植之秦中後漸

生東土

劉涓為貢

晉劉涓書胡桃生西域外剛樸內柔甘似古賢者敬以
為貢

沈約謝賜

梁沈約有謝賜樂遊園胡桃啟

瓊米

楊誠齋詩皴殼傾來紫麥新中藏瓊米不勝珍

珠寶

誠齋詩三韓萬里半天松
方丈蓬萊東復東
珠玉鑲成千歲實
冰霜吹落九秋風
酒邊膈膊牙車響
座上須臾漆榻空
新果新嘗正新暑
繡衣使者念山翁

蓮子

說文蓮荷實也一曰葍
葍西陽雜俎廣知篇湖月蓮子也

露房

杜詩露冷蓮房墜粉紅

冰繭

王琪詩蠶寒冰繭瘦蜂老露房空

醉嚼百圓

東坡詩綠玉蜂房白玉蟬折來帶露復含煙玻璃盆面
冰漿底醉嚼新蓮一百圓

新收千葯

坡詩新收千百秋蓮葯剥盡紅衣搥玉霜不假參同成

氣味跳珠碗裏綠荷香

蕊裏作房

坡詩蜂不禁人採蜜忙荷花蕊裏作蜂房不知玉蛹甜
于蜜又被詩人嚼作霜按蠶化為蛹蛹化為蛾

窠裏成蛹

坡詩蜂兒來自宛溪中兩翅雖無已是蟲不似荷花窠
裏蜜方成玉蛹未成蜂

拳如兜手

山谷詩蓮實大如指分甘念母慈共房頭齧齧更深兄
弟思實中有么荷拳如小兒手念我憶諸雛迎門索梨
藕

稜如馬蹄

司馬溫公詩蓮房前後熟供噉不須齊肉嫩山蜂子稜
如大馬蹄

藕

爾雅荷芙渠其莖茄其葉藎其本蔕其華菡萏其實

蓮其根藕其中韻韻中薏埤雅趙辟公雜記藕能移
凡芙渠行藕如竹之行鞭節生一葉一華華葉相偶
故謂之藕又華初著子首顧在下久之其房倒垂首
更在上也

西王母進

拾遺記周穆王集方士於春宵宮西王母來進萬歲冰
桃千年碧藕

碧衣女詠

樹萱錄有碧衣女子詠詩藕隱玲瓏玉

採藕供食

晉羊敦為廣平太守歲饑家餽不至採藕而食朝廷聞之詔賜穀千斛

踏藕為業

酉陽雜俎大歷中高郵百姓張存以踏藕為業嘗于陂中見旱藕稍大如臂遂併力掘之深二丈大至合抱以其不可窮乃斷之中得一劔長二尺色青無刃存不識

為寶邑人有知者以十束薪易之其藕無絲

冷比霜

韓退之詩太華峰頭玉井蓮
開花十丈藕如船冷比雪
霜甘比蜜一片入口沈痾痊
我欲求之不憚遠青壁無
路難黃緣安得長梯上摘實
下種七澤根株連

生應月

埤雅俗云藕生應月月生一節閏輒益一

玉節

宋陶弼詩萬頃金沙裏誰將玉節裁絲應鮫乞與津是
蚌分來盤貯冰猶結刀侵雪易摧防風骨外折混沌竅
中開月寺僧家鉢風亭酒客杯胸中秋氣入牙角雨聲
回自愧塵泥賤得蒙樽俎陪與君消酷暑瓜李莫相猜

冰姿

胡致隆坐上分題賦藕云平生冰雪姿七星羅心胸豈
無有絲毫上裨天子聰而不自薦達胡為乎泥中沈疴
且無賴安得君從容其子亦可憐風味如乃翁

耕泥

埤雅今江左穿池取汲不欲種藕以藕善耕泥壞池也

翻沼

蘇子由詩春湖柳色黃宿藕凍猶僵翻沼龍蛇動撐船
牙角長

傷葉

國史補蘇州進藕最上者曰傷荷藕欲長其根故傷其
葉

纏絲

陶弼詩綠房翠子暗相失紅藕白絲空自纏

山堂肆考卷二百七